



## O‘ZBEKISTON RESPUBLIKASI NAVOIY VILOYATI HOKIMINING QARORI

Navoiysh., IslomKarimovsh.k 77 A

2023 - yil 30 - noyabr

249-5-0-Q/23

Navoiy viloyati hokimligi

### **O‘zbekiston Respublikasi Prezidentining 2023-yil 27-noyabrdagi “Korrupsiyaga qarshi kurashish tizimini yanada takomillashtirish hamda davlat organlari va tashkilotlari faoliyati ustidan jamoatchilik nazorati tizimi samaradorligini oshirish chora-tadbirlari to‘g‘risida”gi PF-200-sonli Farmoni ijrosini ta‘minlash haqida**

Korrupsiyani oldini olish va unga qarshi kurashish sohasida olib borilayotgan ishlarning natijadorligini oshirish, muhim ijtimoiy masalalarga oid ochiq ma‘lumotlar ko‘lamini yanada kengaytirish, ulardan to‘siqlarsiz foydalanishni ta‘minlash, shuningdek, “O‘zbekiston - 2030” strategiyasida belgilangan vazifalarni amalga oshirish maqsadida, “Mahalliy davlat hokimiyati to‘g‘risida”gi O‘zbekiston Respublikasi Qonunining 6- va 25- moddalariga asosan,

### **QAROR QILAMAN:**

1. O‘zbekiston Respublikasi Prezidentining 2023-yil 27-noyabrdagi “Korrupsiyaga qarshi kurashish tizimini yanada takomillashtirish hamda davlat organlari va tashkilotlari faoliyati ustidan jamoatchilik nazorati tizimi samaradorligini oshirish chora-tadbirlari to‘g‘risida”gi PF-200-sonli Farmoni (keyingi o‘rinlarda -Farmon) ijro uchun qabul qilinsin.

2. O‘zbekiston Respublikasi Prezidentining mazkur Farmoni bilan quyidagilar:

a) O‘zbekiston Respublikasi Korrupsiyaga qarshi kurashish milliy kengashi (keyingi o‘rinlarda - Milliy kengash), Korrupsiyaga qarshi kurashish agentligi (keyingi o‘rinlarda – Agentlik), Bosh prokuraturaning korrupsiyaga oid jinoyatlarning oldini olish bo‘yicha quyidagi tizimni joriy etish haqidagi taklifi ma’qullanganligi:

har chorakda Agentlik davlat organlari va tashkilotlari kesimida sodir etilgan korrupsiyaga oid jinoyatlarni tahlil qiladi va ushbu jinoyatlar ko‘rsatkichi oshgan davlat organlari va tashkilotlariga kechiktirib bo‘lmaydigan chora-tadbirlar belgilash uchun Agentlik xodimlari ishtirokida ko‘rib chiqilishi majburiy bo‘lgan taqdimnoma kiritib boradi;

har yarim yilda jinoyatlarning oldini olish hamda ularga imkon bergan omillarni bartaraf etish bo‘yicha ko‘rilayotgan choralar Milliy kengash yig‘ilishlarida tegishli davlat organlari va tashkilotlarining birinchi rahbarlar ishtirokida tanqidiy muhokama qilib boriladi;

b) korrupsiyaga qarshi kurashish bo‘yicha 2023-2024-yillarga mo‘ljallangan davlat dasturi tasdiqlanganligi;

v) 2023-yil 1-dekabrda boshlab ochiq ma’lumotlar sifatida joylashtirilishi kerak bo‘lgan ijtimoiy ahamiyatga molik ma’lumotlar ro‘yxati quyidagi:

hududlar kesimida “Haj” tadbiriga borish uchun navbatda turgan ziyoratchilarning yagona onlayn navbati to‘g‘risidagi (ziyosatga boruvchi shaxsning arizasi navbatga qo‘yilgan sana va ro‘yxatdagi tartib raqami) ma’lumotlar;

bolalarni davlat maktabgacha ta’lim tashkilotlariga qabul qilish uchun berilgan arizalar navbati (ro‘yxati) to‘g‘risidagi (ariza navbatga qo‘yilgan sana, ro‘yxatdagi tartib raqami, yosh guruhi hamda tashkilot raqami) ma’lumotlar;

davlat organlari va tashkilotlarida davlat xaridlarini amalga oshirish tartib-taomillarini belgilovchi xarid komissiyasining ichki idoraviy tartibi (nizom, reglament, yo‘riqnoma yoki boshqa ichki idoraviy hujjat);

markaziy, hududiy va tizim tashkilotlarida bo‘sh ish o‘rinlari, ishga

qabul qilish shartlari, nomzodlarga qo‘yiladigan talablar va taqdim qilinishi lozim bo‘lgan hujjatlar to‘g‘risidagi ma‘lumotlar;

davlat organlari va tashkilotlari tomonidan nodavlat notijorat tashkilotlarga taqdim etilgan grant va ijtimoiy buyurtma loyihalari haqidagi ma‘lumotlar, shu jumladan, g‘olib bo‘lgan nodavlat notijorat tashkilotlari va ularning buyurtma doirasida bajargan ishlari yuzasidan hisobotlari haqidagi ma‘lumotlar bilan to‘ldirilganligi ma‘lumot uchun qabul qilinsin.

3. Korrupsiyaga qarshi kurashish bo‘yicha 2023-2024-yillarga mo‘ljallangan davlat dasturini amalga oshirishga doir chora-tadbirlar rejasi (keying o‘rinlarda - chora-tadbirlar rejasi) ilovaga muvofiq tasdiqlansin.

Farmonda hamda chora-tadbirlar rejasida nazarda tutilgan tadbirlarning o‘z vaqtida va sifatli amalga oshirilishi ta‘minlansin.

4. Viloyat axborot va ommaviy kommunikatsiyalar boshqarmasi (D. Mamarajabov) viloyat teleradiokompaniyasi (G‘. Sultonov), “Do‘stlik bayrog‘i” va “Знамя дружбы” gazetalari tahririyati DUK (B. Umarov) bilan birgalikda Farmonning mazmun-mohiyatini ommaviy axborot vositalarida keng yoritib borilishini ta‘minlash tavsiya etilsin.

5. Viloyat korrupsiyaga qarshi kurashish hududiy Kengashi (J. Hamroyev), viloyat hokimligi axborot xizmati hamda viloyat hokimligi korrupsiyaga qarshi ichki nazorat qilish sho‘basi (F. Xasanov)ga Farmonning ijrosini samarali tashkil etish topshirilsin.

6. Mazkur qaror ijrosini nazorat qilishni o‘z zimnamda qoldiraman.

Viloyat hokimi



N.Tursunov

Navoiy viloyat hokimining  
2023-yil 30-noyabrda  
249-5-0-Q/23-son qaroriga  
1-ilova

## Korrupsiyaga qarshi kurashish bo'yicha 2023-2024-yillarga mo'ljallangan davlat dasturini amalga oshirishga doir chora-tadbirlar rejasi

T/R	Tadbirning nomi	Amalga oshirish mexanizmi	Ijro muddati	Mas'ul ijrochilar
1.	Korrupsiyaga qarshi kurashishda fuqarolik jamiyati institutlari, tashkilotlari va ommaviy axborot vositalarining rolini oshirish.	Xalq deputatlari viloyat, tuman (shahar) Kengashlari huzuridagi nodavlat notijorat tashkilotlarini va fuqarolik jamiyatining boshqa institutlarini qo'llab-quvvatlash jamoat fondlari tomonidan e'lon qilinadigan davlat grantlari ajratish uchun tanlovlarda muntazam ravishda korrupsiyaga qarshi kurashish yo'nalishidagi mavzular kiritish.	2023-2024-yillarda	Xalq deputatlari viloyat, tuman (shahar) Kengashlari (kelishuv asosida)
2.	Hududlar kesimida "Haj" tadbirlariga borish uchun navbatda turgan ziyoratchilarning yagona onlayn navbati to'g'risidagi (ziyosatga boruvchi shaxsning arizasi navbatga qo'yilgan sana, ro'yxatdagi tartib raqami va ziyorat turi) ma'lumotlar.	Hududlar kesimida "Haj" tadbirlariga borish uchun navbatda turgan ziyoratchilarning yagona onlayn navbati to'g'risidagi ma'lumotlarni belgilangan tartibda veb-saytga kiritib borish.	har chorakda	O'zbekiston musulmonlar idorasi viloyat vakili (kelishuv asosida)

T/R	Tadbirning nomi	Amalga oshirish mexanizmi	Ijro muddati	Mas'ul ijrochilar
3.	Bolalarni davlat maktabgacha ta'lim tashkilotiga qabul qilish uchun berilgan arizalar navbati (ro'yxati) to'g'risidagi (ariza navbatga qo'yilgan sana, ro'yxatdagi tartib raqami, yosh guruhi hamda tashkilot raqami) ma'lumotlar.	Bolalarni davlat maktabgacha ta'lim tashkilotiga qabul qilish uchun berilgan arizalar navbati (ro'yxati) to'g'risidagi ma'lumotlarni belgilangan tartibda veb-saytga kiritib borish.	Har chorakda	viloyat maktabgacha va maktab ta'limi boshqarmasi boshlig'i R.Zokirova
4.	Hokimliklarda davlat xaridlarini amalga oshirish tartib-taomillarini belgilovchi xarid komissiyasining ichki idoraviy tartibi (nizom, reglament, yo'riqnoma yoki boshqa ichki idoraviy hujjat)	Hokimliklarda davlat xaridlarini amalga oshirish tartib-taomillarini belgilovchi xarid komissiyasining ichki idoraviy tartibi to'g'risidagi ma'lumotlarni veb-saytga joylashtirib borish.	Har chorakda	Viloyat hokimligii Ishlar boshqarmasi
5.	Bo'sh ish o'rinlari (markaziy, hududiy va tizim tashkilotlarida), ishga qabul qilish shartlari, nomzodlarga qo'yiladigan talablar va taqdim qilinishi lozim bo'lgan hujjatlar to'g'risidagi ma'lumotlar.	Bo'sh ish o'rinlari (markaziy, hududiy va tizim tashkilotlarida), ishga qabul qilish shartlari, nomzodlarga qo'yiladigan talablar va taqdim qilinishi lozim bo'lgan hujjatlar to'g'risidagi ma'lumotlarni veb-saytga kiritib borish.	Har oyda	Viloyat hokimligi Ishlar boshqarmasi, tashkiliy-kadrlar guruhi

T/R	Tadbirning nomi	Amalga oshirish mexanizmi	Ijro muddati	Mas'ul ijrochilar
6.	Hokimliklar tomonidan nodavlat notijorat tashkilotlarga taqdim etilgan grant va ijtimoiy buyurtma loyihalari haqidagi ma'lumotlar, shu jumladan g'olib bo'lgan nodavlat notijorat tashkilotlari va ularning buyurtma doirasida bajargan ishlari yuzasidan hisobotlari haqidagi ma'lumotlar.	Hokimlik tomonidan nodavlat notijorat tashkilotlarga taqdim etilgan grant va ijtimoiy buyurtma loyihalari haqidagi ma'lumotlar, shu jumladan g'olib bo'lgan nodavlat notijorat tashkilotlari va ularning buyurtma doirasida bajargan ishlari yuzasidan hisobotlari haqidagi ma'lumotlarni veb-saytga joylashtirib borish.	Har yarim yillikda	Viloyat hokimining o'rinbosarlari

**Izoh:** Mas'ul boshqarma va idoralar, viloyat hokimining o'rinbosarlari (guruh va kotibiyatlari) O'zbekiston Respublikasi Prezidentining 2021-yil 16-iyundagi PF-6247-son Farmoni 8-bandi va 2022-yil 14-iyundagi PF-154-son Farmoni 1-ilovasi 4-bandiga asosan yuqoridagi ma'lumotlar yig'in uchun belgilangan muddatda viloyat hokimligining Axborot xizmatiga eslatmasiz taqdim etib boradilar;

Viloyat hokimligining axborot xizmati tegishli ma'lumotlarni veb-saytga joylashtirib, belgilangan muddatlarda yangilab borilishini ta'minlaydi.